


菩薩曼多毘尼毘婆沙

才一

三百五十一

50230



薩婆多毗尼毗婆沙卷第一

子



失譯今附三秦錄



佛默者秦言覺覺了一切法相故復次一切  
衆生長眠三界佛道眼既開自覺覺彼故名  
爲覺佛於一切法能一切知能得一切說問  
曰佛云何一切說爲應時適會隨宜說耶爲  
部黨相從而說法耶荅曰佛隨物適時說一  
切法後諸集法藏弟子以類撰之佛或時爲  
諸弟子制戒輕重有殘無殘撰爲律藏或時  
說因果相生諸結諸使及以業相集爲阿毗  
曇藏爲諸天世人隨時說法集爲增一是勸  
化人所習爲利根衆生說諸深義名中阿含

是學問者所習說種種禪法是雜阿含是坐  
禪人所習破諸外道是長阿含問曰佛若一  
切說者有經云佛坐一樹下捉一枝葉問弟  
子曰此枝葉多樹上葉多白佛言樹上葉多  
佛言我所知法如樹上葉我所說法如手中  
葉云何言佛一切說耶荅曰有別相一切摠  
相一切今言別相一切有言佛能一切說但  
衆生不能一切盡受佛非不能說有言應云  
一切知直云說也不得言一切說問曰若佛  
知而能說聲聞辟支佛亦知而能說何不稱  
佛耶荅曰不尔佛知說俱盡聲聞辟支佛知  
說於法有所不盡復次佛解一切法盡能作

名二乘不能復次佛得無邊法能無邊說二  
乘不能復次有共不共聲聞辟支佛所得共  
佛所得不共小乘所得三乘同知中乘所得  
二乘共知唯佛所得二乘不知獨佛自知復  
次函大蓋亦大法相無邊佛以無邊智知彼  
無邊法二乘智有邊故不稱知法相復次有  
根有義根者惠根義者惠所緣法佛根義俱  
滿惠所緣法無所不盡二乘根義二俱不滿  
復次佛得如實智名於一切法相如實了故  
二乘知法不盡源底兼有所不周是以不得  
稱如實知以是種種義故二乘不得稱佛陀  
婆佉婆者不可以音轉可以義解義云世尊

以能知一切對治法故復次世法言音不同  
世人自不相解佛悉知之故云世尊復次勒  
比丘亦云凡二乘凡夫自說得法或樂靜默  
或入禪定或以餘緣或秘惜不說佛所得法  
以慈悲力故樂為他故復次云已破三毒故  
得稱世尊問曰二乘亦破三毒何不名世尊  
耶答曰不尔二乘有退佛不退故退有三種  
果退不果退所用退果退者小乘三果退下  
果不退中乘二種若百劫習行成辟支佛不  
退若本是小乘三果作辟支佛則果有退佛  
果不退不果退者若向三乘人未得而退若  
比丘修三業懈墮不進凡所修習退而不勤

名不果退也所用退者凡有所得法不現前  
用如佛十力小乘十智用一餘則不用如誦  
十萬言經若不誦時盡名所用退也小乘不  
果退中乘亦有不果退佛無不果退於一切  
行中無不勤故二乘有所用退也佛則不定  
又云佛十力中用一不用九故名退也又云  
無不用退如誦二十萬言經凡人力劣故或  
一日二日誦訖佛能即時誦訖十力亦尔用  
能即用無障礙故無不用退又云佛無不用  
退如著泥洹僧時不直尔著如凡人法皆爲  
利衆生故凡所用法有益則用無益則不用  
非不能用故無不用退也退雖各有所解而

六不可定也佛意不可思議問曰小乘何故  
三果退下果不退答曰三果以曾得故退下  
果未曾得故不退如人飢得美食久則不忘  
此義亦尔又云下果忍作無礙道智作解脫  
道三果智作無礙道智作解脫道故退又云  
見諦道無退思惟道有退淨不淨想斷結故  
思惟道有逼迫見諦道無逼迫見諦結見理  
思惟生故逼迫不退也有云見諦智力強如  
大梁鎮物思惟智弱故退也有云見諦欲界  
忍智二心能斷九品上界忍智二心斷七十  
二品結盡無色界故不退也以是義故獨名  
世尊也復次佛習氣盡二乘習氣不盡如牛



伺比丘常作牛伺以世世牛中來故如一比丘雖得漏盡而常以鏡自照以世世從姪女中來故如一比丘常跳枰躑閣以世世獼猴中來故不得名世尊凡言如是我聞者佛在世時言我聞爲是滅後答曰佛自說法何由言聞是滅後也撰法藏者言我聞佛二十年中說法阿難不聞何得言我聞答曰云諸天語阿難有云佛入世俗心令阿難知有云從諸比丘邊聞有云阿難從佛請願願佛莫與我故衣莫令人請我食我爲求法恭敬佛故侍佛所須不爲衣食諸比丘晨暮二時得見世尊莫令我尔令我欲見便見有佛二十年

中所說法盡爲我說問曰二十年中所說多  
何由可說答曰善巧方便能於一句法中演  
無量法能以無量法爲一句佛粗示其端緒  
阿難盡得以智速利強持力故八万法藏者  
又云如樹根鬚枝葉多名爲一樹佛爲一衆  
生始終說法名爲一藏如是八万有云佛一  
坐說法名爲一藏如是八万有云十六字爲  
半偈三十二字爲一偈如是八万有長短偈  
四十二字爲一偈如是八万有云如半月說  
戒爲一藏如是八万有云佛自說六万六千  
偈爲一藏如是八万有云佛說塵勞有八万  
法藥亦有八万名八万法藏問曰契經阿毗

曇不以佛在初獨律誦以佛在初荅曰以勝  
故秘故佛獨制故如契經中諸弟子說法有  
時如釋提桓因自說布施爲第一何以故我  
以施故得爲天王所願如意佛言如是有時  
化作化佛化佛說法律則不尠一切佛說是  
故以佛在初有如契經隨處隨使律則不尠  
若屋中有事不得即結必當出外若白衣邊  
有事必在衆結若聚落中有事亦在衆結若  
於五衆邊有事必當比丘比丘尼邊結是以  
佛在初毗耶離者或有國以王爲名或以地  
爲稱或以城爲号此國以龍名目迦蘭陀聚  
落者以鳥名之有云聚落主名須提那者父

母求請神祇得故名曰求得富貴者富有二  
種一衆生類二非衆生類非衆生類者多有  
金銀七寶倉庫財帛田疇舍宅衆生類者奴  
婢僕使象馬牛羊村落封邑故名富貴者或  
爲村主或有德美人所宗重故言貴也多財  
種種成就自歸三寶受三歸法問曰三歸以  
何爲性有論者言三歸是教無教性受三歸  
時胡跪合掌口說三歸是名身口教若厚重  
心有身口無教是謂教無教也有云三歸是  
三業性身口意業有云三歸是善五陰以衆  
生善五陰爲三歸以三寶爲所歸所歸以救  
護爲義譬言如有人有罪於王投向異國以求

救護異國王言汝求無畏者莫出我境界莫  
違我教必相救護衆生亦尔繫屬於魔有生  
死過罪歸向三寶以求救護若誠心三寶更  
無異向不違佛教於魔邪惡無如之何如昔  
有一鴿爲鷹所追入舍利弗影戰懼不安移  
入佛影泰然不怖大海可移此鴿不動所以  
尔者佛有大慈大悲舍利弗無大慈大悲佛  
習氣盡舍利弗習氣未盡佛三阿僧祇劫修  
菩薩行舍利弗六十劫中修習苦行以是因  
緣鴿入舍利弗影中猶有怖畏入佛影中而  
無怖畏問曰若歸向三寶能除罪過息怖畏  
者提婆達多亦歸依三寶以信出家受具足

戒而犯三逆墮阿鼻獄。答曰：凡救護者，救可救者，提婆達多罪惡深大，兼是定業，是故不救。問曰：若有大罪，佛不能救。若無罪者，不須佛救。云何三寶能有救護？答曰：提婆達多雖歸三寶，心不真實，三歸不滿，常求利養名聞，自号一切智人，與佛共覓，以是因緣，三寶雖有大力，不能救也。如阿闍世王，雖有逆罪，應入阿鼻獄，以誠心向佛，故滅阿鼻罪，入黑繩地獄。如人中七日重罪，即盡，是謂三寶救護力也。問曰：若調達罪不可救者，又經云：若人歸依佛者，不墮三惡道。是義云何？答曰：調達以歸三寶，故雖入阿鼻獄，受苦輕微，亦時得

暫息有如人在山林曠野怖畏之處若念佛  
功德怖畏即滅是故歸依三寶救護不虛也  
三寶於四諦中何諦所攝於二十二根中何  
根所攝於十八界中何界所攝十二入中何  
入所攝於五陰中何陰所攝三寶於四諦中  
二諦所攝根中三根所攝未知根已知根無  
知根十八界中三界所攝意識界法界  
十二入中意入法入所攝五陰中無漏五陰  
所攝佛寶於四諦中道諦少入法寶於四諦  
中盡諦所攝僧寶於四諦中道諦少入佛寶  
於二十二根中無知根所攝法寶是盡諦無  
為故非根所攝僧寶二十二根中三無漏根

所攝佛寶於十八界中意界意識界法界少  
入十二入中意入法入少入五陰中無漏五  
陰少入法寶於十八界中法界少入十二入  
中法入少入法寶非五陰所攝也陰是有爲  
法寶是無爲故僧寶於十八界中意識界法  
界少入十二入中意入法入少入五陰中無  
漏五陰少入問曰歸依佛者爲歸依釋迦文  
佛爲歸依三世佛耶答曰歸依三世佛以法  
身同故若歸依一佛則是歸依三世諸佛以  
佛無異故又云若歸依三世諸佛者有諸天  
自說我是迦葉佛弟子我拘留孫佛弟子如  
是七佛中各稱我是某佛弟子以是因緣正



應歸依一佛不應三世佛也又云不應尔也  
何以故如毗沙門經說毗沙門王歸依三寶  
歸依過去未來現在佛以是義故應歸依三  
世諸佛問曰若尔者如諸天各稱某甲佛弟  
子此義云何荅曰諸天所說何足以定實義  
有諸天各稱一佛為師亦歸依三世諸佛直  
以一佛為證耳問曰何所歸依名為歸佛荅  
曰歸依語迴轉一切智無學功德問曰為歸  
依色身歸依法身耶荅曰歸依法身不歸依  
色身不以色身為佛故也問曰若色身非佛  
者何以出佛身血而得逆罪荅曰以色身是  
法身器故法身所依故若害色身則得逆罪

不以色身是佛故得逆罪也歸依法者何所  
歸依名歸依法答曰歸依語迴轉斷欲無欲  
盡諦涅槃是名歸依法也問曰為歸依自身  
盡處他身盡處答曰歸依自身盡處亦他身  
盡處是歸依法問曰若歸依僧者何所歸依  
答曰歸依語迴轉良祐福田聲聞學無學功  
德是名歸依僧問曰為歸依俗諦僧為歸依  
第一義諦僧若歸依第一義諦僧者佛與提  
謂波利受三自歸不應言未來有僧汝應歸  
依第一義諦僧常在世間故答曰以俗諦僧  
是第一義諦僧所依故言未來有僧汝應歸  
依有欲尊重俗諦僧故如是說佛自說一切

諸衆中佛衆爲第一譬如從乳出酪從酪出蘇從蘇出醍醐醍醐於中最勝最妙最爲第一佛弟子衆亦復如是若有衆僧集會是中必有四向四得無上福田於一切九十六種中最尊最上無能及者是故言未來有僧汝應歸依不傷正義也問曰佛亦是法法亦是佛僧亦是法正是一法有何差別荅曰雖是一法以義而言有種種差別以三寶而言無師大智及無學地一切功德是謂佛寶盡諦無爲是謂法寶聲聞學無學功德智慧是謂僧寶以法而言無歸無學法是謂佛寶盡諦無爲非學非無學法是名法寶聲聞學無學法

是名僧寶以根而言佛是無知根法寶非根  
法也僧是三無漏根以諦而言佛是道諦少  
入法寶是滅諦僧是道諦少入以沙門果而  
言佛是沙門法寶是沙門果僧是沙門法寶  
是沙門果以婆羅門而言佛是婆羅門法寶  
是婆羅門果僧是婆羅門法寶是婆羅門果  
以梵行而言佛是梵行法寶是梵行果僧是  
梵行法寶是梵行果以因果而言佛是因法  
寶是果僧是因法寶是果以道果而言佛是  
道法寶是道果僧是道法寶是道果佛以法  
為師佛從法生法是佛母佛依法生問曰佛  
若以法為師者於三寶中何不以法為初答

曰法雖是佛師而法非佛不弼所謂道弼由  
人也是以佛在初問曰若受三歸或時先稱  
法寶後稱佛者成三歸不荅曰若無所曉知  
說不次第者自不得罪得成三歸若有所解  
故倒說者得突吉羅亦不成三歸問曰若稱  
佛及法不稱僧者成三歸不若稱法僧不稱  
佛寶成三歸不若稱佛僧不稱法寶成三歸  
不荅曰不成三歸問曰若不受三歸得五戒  
不若不受三歸得八齋不若不受三歸得十  
戒不若不白四羯磨得具戒不荅曰一切不  
得若欲受五戒先受三歸受三歸竟亦時已  
得五戒所以說五戒名者欲使前人識五戒

名字故白四羯磨竟已得具戒所以說四依  
四墮十三僧殘者但為知故說也有言受三  
歸竟說不殺一戒今時得戒所以說一戒得五  
戒者為能持一戒五戒盡能持故有以五戒  
勢分相著故兼本意誓受五戒故有言受五  
戒竟然後得戒於諸說中受三歸已得五戒  
者此是定義如白四羯磨法若受八戒若受  
十戒如五戒說若五戒十戒八戒但受三歸  
便得戒若受具戒要白四羯磨而得具戒不  
以三歸也凡具戒者功德深重不以多緣多  
力無由致得是故三師十僧白四羯磨而後  
得也五戒八戒十戒功德力少是故若受三

歸即便得戒不須多緣多力受具戒也何以  
故但說四波羅夷十三僧殘不說餘篇耶此  
二篇戒最是重者一篇戒若犯互不起二篇  
雖起難起若波利婆沙摩那埵二十衆中而  
後出罪若難持而能持者餘易持戒不須說  
也是故但說二篇不說餘篇問曰是波羅提  
木又戒是無漏戒是禪戒不答曰非無漏戒  
亦非禪戒此波羅提木又戒若佛在世則有  
此戒佛不在世則無此戒禪無漏戒若佛在  
世若不在世一切時有波羅提木又戒從教  
而得禪無漏戒不從教得波羅提木又從他  
而得禪無漏戒不從他得又波羅提木又戒

不問眠與不眠善惡無記心一切時有禪無  
漏戒必無漏心中禪心中有戒餘一切心中  
無也波羅提木叉戒但人中有禪無漏戒人  
天俱有波羅提木叉戒但欲界中有禪戒無  
漏戒欲色界俱有無色界成就無漏戒波羅  
提木叉戒但佛弟子有禪戒外道俱有問曰  
優婆塞五戒幾是實罪幾是遮罪答曰四  
是實罪飲酒一戒是遮罪飲酒所以得與四  
罪同類結爲戒者以飲酒是放逸之本能犯四  
戒如迦葉佛時有優婆塞以飲酒故邪淫他  
婦盜他雞殺他人問言何以故尔答言不作  
以酒乱故一時能破四戒又以飲酒故能犯



四逆惟不能破僧耳雖非宿業有狂亂報以飲酒故迷惑倒亂猶若狂人以飲酒故廢失正業坐禪誦經佐助衆事雖非實罪以是因緣與實罪同列問曰優婆塞戒但於衆生上得戒非衆生上亦得戒不但於可殺可盜可姪可妄語衆生上得戒耶若於不可殺不可姪不可盜不可欺誑衆生亦得戒耶荅曰於衆生上得四戒於非衆生上得不飲酒戒若衆生可殺不可殺可盜不可盜可姪不可姪可妄語不可妄語一切得戒下至阿鼻地獄上至非想處及三千世界乃至如來一切有命之類盡得此四戒以初受戒時一切不殺

一切不盜一切不姪一切不妄語無所限齊  
以是故一切衆生上無不得戒凡受戒法先  
與說法引道開解令於一切衆生上起慈愍  
心既得增上心便得增上戒夫得戒法於一  
切衆生上各得四戒四戒差別有十二戒於  
一切衆生上不殺不盜不姪不妄語凡起四  
惡有三因緣一以貪故起二以瞋故起三以  
癡故起於一切衆生上有十二惡以返惡故  
得十二善戒色也一切無邊衆生上亦復如  
是後有百万千万阿羅漢入於涅槃先於此  
阿羅漢上所得戒始終成就不以羅漢泥洹  
故此戒亦失也得戒不飲酒戒時此一身始終

三千世界內一切所有酒上咽咽得戒色以  
受戒時一切酒盡不飲故設酒滅盡戒常成  
就而不失也先受戒時於一切女人上三瘡  
門中得不姪戒而後取婦犯此戒不答曰不  
犯所以尔者本於女上得不邪姪戒今是自  
婦以非邪姪故不犯此戒以此語推一切同  
尔以八戒十戒衆生非衆生類得戒亦如是  
二百五十戒一切衆生上各得七戒以義分  
別有二十一戒如一衆生上起身口七惡凡  
起此惡有三因緣一以貪故起二以瞋故起  
三以癡故起以三因緣起此七惡三十七  
一惡反惡心得戒一衆生上得二十一戒色

一切衆生上亦復如是。有五種子如一種子  
中破一粒麥一粒粟斷一根菓摘一枝葉隨  
所破所斷各得一罪隨所得罪處反罪得戒  
得令所戒本受戒時不殺一切草木一切草  
木上盡得戒色如不掘地戒一微塵上得一  
戒色三千世界下至金剛地際一一微塵上  
得一戒色亦復如是。二百五十戒中若衆生  
非衆生類上得戒多少以義而推可以類解  
得戒時一時一一戒上得無量戒如一不殺  
戒一衆生上各得三戒。凡殺法以三因緣故  
殺一以貪故二以瞋故三以癡故。殺以反殺  
得三戒色。若以貪故殺一人者於一人上三

不殺戒中但犯一不殺戒二不殺戒不犯一切衆生上一切不犯而犯此一戒得波羅夷以罪重故譬如穿器不受道水不能得沙門四果故名非沙門初犯一戒已毀破受道器名波羅夷後更殺人得突吉羅實罪雖重無波羅夷名以更無道器可破故而此比丘故名破戒比丘不名非比丘也以此義推可一時得無量戒不可一時盡犯也而得一時捨戒也凡破戒法若破重戒更無勝進後還捨戒後更受者更不得戒也如破八戒中重戒更受八戒若受五戒若受十戒若受具戒兼禪無漏戒一切不得若破五戒中重戒若更

受八戒十戒具戒并禪無漏戒一切不得若  
破五戒中重戒已欲捨五戒更受戒者無有  
是處若捨戒已更受五戒若受八戒十戒具  
戒并禪無漏戒一切不得也若破十戒具戒  
中重戒者若欲勝進若欲捨戒還受戒者如  
五戒中說問曰禪戒無漏戒波羅提木又戒  
於三戒中何戒爲勝荅曰禪戒無漏戒爲勝  
有云波羅提木又戒勝所以尔者若佛出世  
得有此戒禪戒無漏戒一切時有於一切衆  
生非衆生類得波羅提木又戒禪戒無漏戒  
但於衆生上得於一切衆生上慈心得波羅  
提木又戒禪戒無漏戒不以慈心得也夫能

維持佛法有七衆在世間三乘道果相續不  
斷盡以波羅提木又爲根本禪無漏戒不介  
是故於三戒中最爲殊勝初受戒時白四羯  
磨已成就色戒始一念戒色名業道  
第二念已後所生戒色但是業非業道所以  
介者初一念戒色思願滿足以思通故名思  
業道以前戒色爲因故後戒色任運自生是  
故但名業非業道初一念戒有教有無教後  
次第生戒但有無教無有教也初一念戒亦  
名爲戒亦名善行亦名律儀後次續生戒亦  
有此三義問曰三世中何世得戒答曰現在  
一念得戒過去未來是法非衆生故不得戒

現在一念是衆生故得戒亦有此三義問曰  
爲善心中得戒爲不善心中爲無記心中爲  
無心中得戒耶荅曰一切盡得先以善心禮  
僧足已受衣鉢求和上問清淨已受戒胡跪  
合掌白四羯磨已相續善心戒色成就是謂  
善心中得戒若先次第法中常生善心起諸  
教業白四羯磨時或起貪欲瞋恚等諸不善  
念於此心中成就戒色是名不善心得戒也  
以本善心善教力故而得此戒非不善心力  
也先以善心起於教業白四羯磨時或睡或  
眠或於眠心而得戒色是名無記心中而得  
戒也先以善心起於教業白四羯磨時入滅



盡定即於今時成就戒色是名無心中而得  
戒也問曰若白衣不受五戒直受十戒得戒  
不答曰一時得二種戒得優婆塞戒得沙彌  
戒若不受五戒十戒直受具戒 時得三種  
戒問曰若受具戒一時得三種戒者何須次  
第先受五戒次受十戒後受具戒耶答曰雖  
一時得三種戒染習佛法必須次第先受五  
戒以自調伏信樂漸增次受十戒既受十戒  
善心轉深次受具戒如是次第得佛法味好  
樂堅固難可退敗如遊大海漸漸深入入佛  
法海亦復如是若一時受具戒者既失次第  
又破威儀復次或有衆生應受五戒而得道

果或有衆生因受十戒而得道果以是種種  
因緣是故如來說此次第若先受五戒次受  
十戒受十戒時亦成就二戒五戒十戒已次  
受具戒受具戒時成就三種戒五戒十戒具  
戒七種受戒中唯白四羯磨戒次第三時得  
餘六種受戒但一時得無三時次第得也若  
一時得三種戒若欲捨時若言我是沙彌非  
比丘即失具戒二種戒在五戒十戒若言我  
是優婆塞非沙彌即失十戒五戒在若言在  
家出家一切盡捨我是三歸優婆塞三種一  
時盡失不失三歸若次第得三種戒捨法次  
第如一時得戒中說若先受優婆塞五戒後

出家受十戒捨五戒不荅曰不捨但失名失  
次第不失戒也失優婆塞名得沙彌名失白  
衣次第得出家次第若沙彌受具足戒時失  
十戒五戒不荅曰不失但失名失次第不生  
戒也失沙彌名得比丘名失沙彌次第得比  
丘次第始終常是一戒而隨時受名譬如樹  
葉春夏則青秋時則黃冬時則白隨時異故  
樹葉則異而始終故是一葉戒亦如是常是  
一戒隨時有異有如乳酪蘇醍醐四時差別  
雖隨時有異而故是一乳也戒亦如是雖三  
時有異戒無異也問曰凡受優婆塞戒設不  
能具受五戒若受一戒乃至四戒受得戒不

答曰不得若不得者有經說有少分優婆塞  
多分優婆塞滿分優婆塞此義云何答曰所  
以作是說者欲明持戒功德多少不言有如  
是受戒法也問曰若受一日二日乃至十日  
五戒得如是受不答曰不得佛本制戒各有  
限齊若受五戒必盡形受若受八戒必一日  
一夜是故不得異也夫白四羯磨戒有上中  
下五戒是下品戒十戒是中品戒具戒是上  
品戒又五戒中亦有三品若微品心受戒得  
微品戒若中品心受得中品戒若上品心受  
戒得上品戒十戒具戒亦各有三品如五戒  
說若微品心受戒得五戒已後以中上品心

受十戒者先得五戒更無增無勝於五戒外  
乃至不非時食等殘餘五戒得增上五戒先  
得五戒仍本微品也即先微品五戒更無增  
無勝仍本五戒自五戒外一切諸戒以受具  
戒時心增上故得增上戒以是義推波羅提  
木叉戒無有重得以次第而言五戒是微品  
十戒是中品具戒是上品以義而推亦可以  
上品心得五戒是上品戒中品心得十戒是  
中品戒下品心得具戒是下品戒以是義故  
隨心有上中下得戒不同無有定限也若生  
請和尚受十戒時和尚不現前亦得十戒若  
受十戒時和尚死者若聞知死受戒不得若

不聞死受戒得戒若白四羯磨受具足戒和尚不現在前不得受戒以僧數不滿故若僧數滿設無和尚亦得受戒

問曰五戒優婆塞得販賣不答曰得聽販賣但不得作五業一不販賣畜生以此為業若自有畜生直賣者聽但不得賣與屠兒二者不得販賣弓箭刀杖以此為業若自有者直聽賣三者不得沽酒為業若自有者亦聽直賣四者不得壓油為業以油多殺虫故天竺法亦自罽賓已來麻中一切無虫若無虫處壓油無過也五者不得作五大色漆為業以多殺虫故洛沙等外國漆法多殺諸虫是故

不聽謂秦地染青法亦多殺重墮五大染數  
問曰夫以齋法過中不食乃有九法何故八  
事得名答曰齋法以過中不食爲體以八事  
助成齋體共相支持名八支齋法是故言八  
齋不云九也若受八戒人於七衆中爲在何  
衆雖不受終身戒以有一日一夜戒故應名  
優婆塞有云若名優婆塞無終身戒若非優  
婆塞有一日一夜戒但名中間人問曰若七  
衆外有波羅提木叉戒不答曰有八齋是以  
是義推若受八戒不在七衆也受八齋法應  
言一日一夜不殺生令言語決絕莫使與終  
身戒相亂

問曰受八戒法得二日三日乃至十日一時  
受不答曰佛本制一日一夜不得過限若有  
力能受一日過已次第更受如是隨力多少  
不計日數也夫受齋法必從他受於何人邊  
受五衆邊已受八戒若鞭打衆生齋不清淨  
雖即日不鞭打衆生若待明日鞭打衆生亦  
不清淨以要而言若身口作不威儀事雖不  
破齋齋不清淨設身口清淨若心起貪覺欲  
覺瞋恚覺惱害覺亦名齋不清淨雖身口意  
三業清淨若不修六念亦名齋不清淨受八  
戒已精修六念是名齋清淨有經說若作閻  
浮提王於閻浮提中一切人民金銀財寶於



中自在雖有如是功德以八齋功德分作十  
六分閻浮提王功德於十六分中不及一分  
所謂最後清淨八齋也若人欲受八齋先恣  
情女色或作音樂或貪飲噉種種戲笑如是  
等放逸事盡心作已而後受齋不問中前中  
後盡不得齋若本無心受齋而作種種放逸  
事後遇善知識即受齋者不問中前中後一  
切得齋若欲受齋而以事難自礙不得自在  
事難解已而受齋者不問中前中後一切得  
齋問曰若欲限受晝日齋法不受夜齋得八  
齋不若欲受夜齋不受晝齋得八齋不答曰  
不得所以尔者佛本聽一日一夜齋法以有

定限不可違也問曰若不得者如皮革中說  
億耳在曠野見諸餓鬼種種受罪或晝則受  
福夜則受罪或夜則受福晝則受罪所以介  
者以本人中晝受齋法夜作惡行或夜受齋  
法晝作惡行是以不同此義云何荅曰凡是  
本生因緣不可依也此中說者非是修多羅  
非是毗尼不可以定義也有云此是迦旃延  
欲度億耳故作變化感悟其心非是實事若  
受齋已欲捨齋者必要從五衆而捨齋也若  
欲食時趣語一人齋即捨凡得波羅提木叉  
戒者以五道而言唯人道得戒餘四道不得  
如天道以著樂深重不能得戒如昔一時大

目捷連以弟子有病上忉利天以問耆婆正值諸天入歡喜園介時目連在路側立一切諸天無願看者耆婆後至願見目連向舉一手乘車直過目連自念此本人間是我弟子而今受天福以著天樂都失本心即以神力制車令住耆婆下車禮目連足目連種種因緣責其不可耆婆答目連曰以我人中爲大德弟子是故舉手問訊頗見諸天有介者不生天以著樂染心不得自在是使介耳目目連問耆婆曰弟子有病當云何治耆婆答曰唯以斷食爲本有時目連勸釋提桓因佛世難值何不數數相近諮受正法帝釋欲解目連

意故遣使勅一天子令來反覆三喚猶故不  
來此一天子唯有一婦有一伎樂以染欲情  
深雖復天王命重不能自割後不獲已而來  
帝釋問曰何故尔耶即以實而對帝釋白目  
連曰此天子唯有一天女一伎樂以自娛樂  
不能自割況作天王種種宮觀無數天女天  
須隨食自然百味百千伎樂以自娛樂視東  
忌西雖知佛世難遇正法難聞而以染樂纏  
縛不得自在知可如何凡受戒法以勇猛心  
自誓決斷然後得戒諸天著樂心多善心力  
弱何由得戒餓鬼以飢渴苦身心焦然地獄  
無量苦惱種種楚毒心意著痛無緣得戒畜

生中以業障故無所曉知無受戒法雖處處  
經中說龍受齋法以善心故而受八齋一日  
一夜得善心功德不得齋也以業障故以四  
天下而言惟三天下閻浮提瞿耶尼弗婆提  
及三天下中間海洲上人一切得戒如瞿耶  
尼弗婆提賓頭盧往彼大作佛事有四部衆

東方亦有比丘在彼而作佛事有四部衆唯  
鬱單越無有佛法亦不得戒以福報障故并  
愚癡故不受聖法有四種人一男二女三黃  
門四二根四種人中唯男女得戒二種人不  
得戒黃門二根如是男女中若殺父母殺阿  
羅漢出佛身血破僧輪污比丘尼賊住越濟

人斷善根如是等人盡不得戒大而觀之受  
佛法者蓋不足言若天若龍若鬼神若鬱單  
越若不男二根種種罪人盡得受三歸也問  
曰三世諸佛得戒等不答曰不等凡得戒者  
於衆生非衆生類上得戒而一佛出世度無  
量阿僧祇衆生入無餘涅槃而後佛出世於  
此衆生盡不得戒如是諸佛先後得戒各各  
一等如迦葉佛度無數阿僧祇衆生入無餘  
涅槃而迦葉佛於此衆生盡皆得戒釋迦文  
佛於此衆生盡不得戒一切諸佛有三事等  
一者行等二者法身等三度衆生等一切諸  
佛盡三阿僧祇劫修菩薩行盡具五分法身

十力四無所畏十八不共法盡度無數阿僧  
祇衆生入於泥洹問曰經云一佛出世度九  
十那由他衆生入於泥洹何以言無數阿僧  
祇衆生耶答曰此經說一佛出世度九十那  
由他衆生者但云從佛得度者有念所衆生  
而衆生或自從佛得度或從佛弟子或遺法  
中而得度者言九十那由他衆生直佛邊得  
度者統而言之無數阿僧祇衆生入無餘泥  
洹三世諸佛三事盡等而得戒不等問曰惡  
律儀戒衆生類非衆生類上得耶能以不能  
盡得戒不答曰但於衆生上得惡律儀戒非  
衆生類上不得惡律儀戒有云但於能殺衆

生上得惡戒不可殺衆生上不得惡戒有二  
可殺不可殺衆生上盡得惡戒如屠兒殺羊  
常懷殺心作意殺羊無所齊限設在人天中  
今者不殺而受生展轉有墮羊中理是故於  
一切衆生盡得惡戒十二惡律儀亦是十  
二惡律儀者一者屠羊二者魁膾三者養猪  
四者養雞五者捕魚六者獵師七者網鳥八  
者捕鱗九者呪龍十者獄吏十一者作賊十  
二者王家常差捕賊人是爲十二惡律儀養  
活皆不離惡律儀也惡律儀戒有三時捨死  
時欲愛盡時受律儀戒時如受三歸時始初  
一說即捨惡戒第二第三說時即得善戒問



曰善戒人作惡戒人時何時捨善戒得惡戒  
答曰一說言我即屠兒即捨善戒第二第三  
說我作屠兒即得惡戒又云隨何時捨善戒  
即得惡戒若善戒人未自誓作屠兒但以貪  
利養共屠兒作殺害事亦時名犯善戒未捨  
善戒未得惡戒必自誓作屠兒而得惡戒若  
受惡戒自誓便得不從他受若欲受一日二  
日乃至十日一年二年惡律儀戒隨誓心久  
近隨意即得所以亦者以是惡法順生死流  
無勝進義是故隨心即得不同善律儀也

薩婆多毗尼毗婆沙卷第一

子

佛馱下唐反 佉丘迤反 逼迫上彼力反 牛同詩下音

跳上他吊反 枰步萌反 粗才古反 端緒下音 田疇下流反 直

叵反疋可 醜題二字音 突吉上骨徒反 互不上護音 那

塿下果反 咽於見反 搗地上物其反 剝賓上例反 壓

押反音 娛樂上音 魁膾上苦回反 蟻大也 獵

反

